

**Date – 11/04/2026**

**Time - 18:30 -18:40Hrs**

**AKASHVANI AIZAWL**

**REGIONAL NEWS BULLETIN**

**HEADLINES ( EVENING )**

1. Lok Sabha MP Pu Richard Vanlalhmangaiha'n MP Local Area Development Scheme chu mipui sum anih angin khawtlang tana huam zau thei ang bera hman a tum thu a sawi.
2. Aizawl Municipal Corporation inthlan April ni 21-a neih turah political party-te ngawrh takin an campaign mek.
3. Vawiin atangin Pakistan-a Islamabad khawpuiah US leh Iran ten remna daihrei zawk an neih theih nan inbiakna tan a ni.
4. External Affairs Minister Dr.S.Jaishankar-a chuan Armenia kaltlangin India mi sanghamantu mi 345 chu him takin Iran atangin India ah thiarchhuah an ni a ti.

<><><>

**LS MP**

Lok Sabha MP Pu Richard Vanlalhmangaiha'n MP Local Area Development Scheme chu mipui sum anih angin khawtlang tana huam zau thei ang bera hman a tum thu a sawi.

Pu Richard Vanlalhmangaih hian vawiin khan Republic Veng leh Upper Republic Veng YMA hnenah Mahindra Bolero Pick-Up pakhat ve ve a pe a, MP Local Area Development Scheme atanga inpek anih thu sawiin scheme chu mipui tana tangkai taka hman tur a nih avangin khawtlang tan a huam zau thei ang bera hman a duh thu a sawi.

Aizawl South I bialtu MLA Pu C Lalsawivunga chuan motor an dawn chu khawtlang mipui ten tangkai taka an hman ngei a beisei thu sawi a, damlo ruang phurhna chauh nilo veng tana thil tangkai hrang hrangah hmang turin a chah a ni.

<><><>

**MNF PRESS CONFERENCE**

MNF AMC Candidate Pi R Lalnunthari'n Aizawl khawpui khawsak phung chu dinhmun sang zawka hlankai tumin MNF Party an inruahman tih a sawi.

He thu hi vawiina Aizawl Press Club-a thuthar thehdarhtute an kawmna ah sawiin Pi R. Lalnunthari chuan Aizawl khawpui nuam leh changkang zawk siam zel

an tum thu a sawi a, Aizawl khawpui chu hawisan an tumlo tih sawiin dinhmun sang zawka hlankai an tum thu a sawi.

Pi R Lalnunthari chuan AMC Inrelbawlna tha zawk leh chak zawk siam tum a ni tiin AMC hnuaia Deve-lopment hnathawh reng reng kut tling leh mawi, belhchian dawl a nih zel theih nan hmalak chhunzawm a ni dawn a ti a, AMC sorkar chak zawk leh langtlang din chhunzawm tum a nih thu sawiin AMC huam chhungah khualzin leh pem lut an pun zel avangin Aizawl khawpuia cheng dik takte chhinchhiaha (Population Registration) uluk zawka kalpuin - nau piang, mitthi leh pem lutte chhinchhiaha an tum a ti a, Aizawl khawpui veng hrang hrangte leimin leh lei tlahniam laka a him zawk nan tuihawk luankawr tha zawk leh a khuhna siam belh an tum tih sawiin heng ti hlawhtling tur hian MNF Candidate te thlang tling turin mipuite a sawm a ni.

MNF Candidate chuan Aizawl khawpui veng thenkhat lirthei luh theih lohnaah bawlhhlawh paih dan mumal zawk ruahman a ni dawn ati a, Ran vulh leh ran khuahkhirh chungchangah Local Council-te be rawnin mipui zawh tawka hmalak chhunzawm zel a ni dawn tih a sawi bawk.

Pi R Lalnunthari chuan Social Media ah mimala beihna a tawk nasa tih sawiin amah hawtute leh amah beitate chu Pathian hmingin a ngaidam vek a ti a, Ward 4 a hmangaih em avangin tling ngei turin theitawp a chhuah thu a sawi bawk.

<><><>

## **AMC ELECTION**

Aizawl Municipal Corporation (AMC) inthlan atana vote thlak ni tura ruat April ni 21, 2026 atanga chhiar letin ni 10 ala awm a, AMC inthlan tur atan hian political party-te ngawrh takin an campaign mek a ni.

Puan tawh angin AMC Inthlan neih turah hian political party pathum - Indian National Congress (INC) Mizo National Front (MNF) leh Zoram Peoples Movement (ZPM) ten ward tin chuh turin candidate 19 theuh an nei a, Bharatiya Janata Party (BJP) pawhin ward 11 chuh turin candidate an nei bawk.

Vote thlak ni tur atan April ni 21, 2026 ruat a ni a, zing dar 7 atanga tlai dar 5 thleng vote thlak hun hawn a ni ang. Inthlan result hi April ni 27 zing dar 8 atangin chhiar tur a ni.

AMC inthlan hi tum 3 neih a ni tawh a, inthlan hmasa ber kha November ni 3, 2010-ah neih niin MNF party-in seat 6, ZNP leh INC-in seat 5 ve ve leh MPC-in seat 3 an la a; inthlan vawi 2-na hi November ni 26, 2015-ah neih niin MNF-in seat 11, INC-in seat 7 leh MPC-in seat 1 an la a ni.

Inthlan hnuhnung ber February ni 16, 2021-ah khan a tirah MNF-in seat 11 an laa, ZPM-in seat 6 leh INC-in seat 2 an la. Vanduaithlak takin Ward No.6 corporator Pu John Zosangliana Ralte (MNF) chu a boral avangin by-election neih a ni a, hetah hian ZPM candidate Pu H Lalremtuanga thlan tlin niin, term tawp thlengin MNF-in seat 10, ZPM-in seat 7 leh INC-in seat 2 an nei ta a ni.

<><><>

## **OIL & GAS**

Mizoram Sorkar chuan, indona thleng mek vanga eirawngbawlna Gas leh tuialhthei-a harsatna thleng thei lakah Mizoram Sorkar chuan ngawrh takin hma a la reng a. Tun dinhmunah eirawngbawlna Gas leh tuialhthei chu Mizoramah a thleng tha a, mipui tan chia-na tur a awm lo tih an sawi.

### **Voicecast**

*Sawrkhar tarlan danin nimin April ni 10 thleng khan Mizorama LPG Distributor hrang hrangah Domestic (14.2Kg) bur 13924 a awm a, kawng laka thang mek bur 25465 nen a vaiin bur 39389 awm ang a ni a. Commercial (19Kg) chu Distributor-ten bur 613 an kawl bakah kawng laka thang mek nen avaiin bur 1021 a awm a. Petrol pawl Filling Station-ah Kilolitre 1251.10 awmin, kawng laka thang mek Kilolitre 484 nen a vaiin Kilolitre 1735.10 awm ang a ni a. Diesel chu Filling Station-a Kilolitre 1508.80 awmsa bakah kawng laka thang mek Kilolitre 596 nen a vaiin Kilolitre 2104.80 awm ang a ni.*

<><><>

### **CYMA PRESIDENT**

Central YMA President Pu R Lalnggheta'n Ruihhlo ngaite chhanchhuah chu hna hautak ni mahse beidawng lova mahni mawhphurhna theuha ngaih a tul thu a sawi.

He thu hi Seling YMA Run-a Zawlbuk Group YMA Inkhawmpui vawi 45-na a palai te thlahna leh YMA Kumpuan, 'Ruihhlo Do' hawna hun a hmanpuina ah sawiin CYMA President chuan ruihhlo avanga Mizo thalaite thlanmuala an liam zel avangin ruihhlo do turin theihtawp chhuah a ngaih thu a sawi a, Ruihhlo laka hnam chhanchhuah a tul thu a sawi.

Pu R. Lalnggheta chuan Aizawl khawpui chhung leh hmun hrang hranga ruihhlo ngai, khawlaia vakvaia thilruk hial hmanga eizawngte enkawl an ngai hle tih a sawi baw a. High School kal lai atanga ganja khawih tan an awm chu paw a tih thu sawiin, ruihhlo zuartute chu kan thlai suattu an nih avangin dim loh tur leh zah dek dek lo turin mipuite a chah a. He ruihhlo indonaah hian tlawm mai tur kan ni lo tih sawiin lungual taka pheikhai rual taka pen turin kal khawmte chu a fuih a ni.

<><><>

### **MPCC PRESS CONFERENCE**

Mizoram Pradesh Congress Committee chuan damlo enkawl dan inang renga Mizorama private damdawiin aain state pawna private damdawiin chu sawrkarin a duhsak zawk thu an sawi.

MPCC hian vawiin khan Aizawl Press Club ah thuthar thehdarhtute kawmin MPCC General Secretary Pu Joseph Lalhlimpuia chuan State pawna damdawiinte nen enkawl dan inang rengah Mizoram chhunga private damdawiin aia man to zawk ah MR Bill theihna a siam laia, mipui te ban phak maia awm Mizoram chhunga private hospitalah MR Bill theih loh tlat chu Mizoram mipui zahlohna leh hnamdang duhsakna dik takah MPCC chuan a ngai tih a sawi a ni.

MPCC General Secretary Healthcare scheme chungchanga sorkar hmalakna ah Damdawiin hrang hrang nen inremna an siam danah sum chet vel dan thup tlat a nih thu a sawi a, mipui sum chet vel dan hriat chu mipui chanvo a nih thu sawiin

langtlang sorkar chu democracy zepui a ni an ti a, heng zawng zawng hi ZPM sorkar chuan palzutin damdawiin te nena an inremna zat chu thup bo tlat ani tih sawiin mipui zahlohna anih thu a sawi bawk.

<><><>

## **LOK ADALAT**

Lunglei District Legal Services Authority buatsaihin vawiin khan Regular Lok Adalat chu District Court Building, Lunglei-ah hman a ni a. Lunglei District chhunga thubuai 146 ngaihtuah a ni.

Vawin Lok Adalat-a thubuai ngaihtuah tur hian Bench pakhat a siam niin, Bench -I hi Chief Judicial Magistrate Pu Lalramsanga'n kaihruiin Advocate Pu B. Laldinpuia leh Social Worker Pu H. Vanlallawma te an thu a. Thubuai 146 atang hian 38 sawirempui niin, tihfel a ni.

Thubuai ngaihtuahah hian leiba inthinna tam berin, Rs. 8,69,757/- (Cheng Nuaih Riat Singruk Sangkua Za Sarih Sawmnga leh Pasarih) lai chinfel a ni. Lok Adalat-ah hian thubuai neitute duhdan angin inremna ziahpui thin a ni a. Sum sen ngai loin, ukil rawih man ngai lovin thubuai hi chinfel sak thin a ni.

<><><>

## **AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

## **KHAWZAWL DISTRICT WRESTLING ASSOCIATION**

Vawiin khan Khawzawl Zaingen YMA Hall ah Khawzawl District Wrestling hawn a ni.

Khawzawl Sub Deputy Commissioner PuR. Lalrinhlua chuan Khawzawlin Wrestling Association a nei chu lawmawm atih thu sawiin infiamna chawisan zel anih theihna tura hmanraw pawimawh tak anih a beisei thu a sawi a, infiamna chuan rilru hrisel a ken tel avangin mihring hriselna atan a pawimawh avangin infiamna uar deuh deuh turin kalkhawmte a sawm a ni.

Khawzawl District chhungah Sports Association hrang hrang 17 vel a awm a. Annual Program duante hmangin chhawmdawlina dawn thin ani, a ti bawk.

<><><>

## **US-IRAN**

Vawiin atangin Pakistan-a Islamabad khawpuiah US leh Iran ten remna daihrei zawk an neih theih nan inbiakna tan a ni. US aiawhte hi Vice President JD Vance-a kaihruiin an kal a. An zingah hian special envoy Stve Witkoff leh adviser Jared Kushner te pawh an tel a ni. Vice President JD Vance chuan a zin chhuah hmaa

a thuchhuahah an inbiakna chuan rah tha a chhuah a beisei thu a sawi a ni. Hetihlai hian Iran lam hi Parliament Speaker Mohammad Bagher Ghalibaf-a kaihruaiin an tel vet hung a. An inbiaknaah hian Iran nuclear programme chungchangte, ballistic missile siamna leh Strait of Hormuz chungchangte an sawi rin a ni a. Kar hnih chhung inkahhai puan a nih mek lain inbiakna hi neih a ni.



## **FISHERMEN**

External Affairs Minister Dr.S.Jaishankar-a chuan Armenia kaltlangin India mi sanghamantu mi 345 chu him takin Iran atangin India ah thiarchhuah an ni a ti. Social Media ah he thu hi tarlangin Dr.Jaishankar-a chuan Armenia sawrkar chungah leh an Foreign Minister Ararat Mirzoyan chungah lawmthu a sawi a. India mi sanghamantute him taka Iran atanga phurhchhuah an nih theih nana an puihnaah lawmthu a sawi a ni.

